



神农本草经疏

明·缪希雍 撰

【下】

中医古籍出版社

中医典籍丛刊

神农本草经疏

(下)

明·缪希雍 撰



中医古籍出版社

神农本草经疏卷十

草部下品之上

总六十二种，今疏共要者一十六种。

附子 半夏 大黄 葶苈 桔梗 草蒿 旋复花 藜芦
射干 常山 甘遂 白敛 白及 大戟 贯众 羊躑躅

附子

味辛、甘，温、大热，有大毒。主风寒咳逆邪气，温中，金疮，破症坚积聚血瘕，寒湿痿痹，拘挛膝痛，脚疼冷弱，不能行步，腰脊风寒，心腹冷痛，霍乱转筋，下痢赤白，坚肌骨，强阴，又堕胎，为百药长。冬月采为附子，春采为乌头。忌豉汁。得蜀椒、食盐可引之下行。地胆为之使。恶蜈蚣。畏防风、黑豆、甘草、黄耆、人参、童便、犀角。

【疏】附子全禀地中火土燥烈之气，而兼得乎天之热气，故其气味皆大辛大热，微兼甘苦，而有大毒。气厚味薄，阳中之阴，降多升少，浮中沉无所不至。入手厥阴，命门，手少阳三焦，兼入足少阴、太阴经。其性走而不守，得甘草则性缓，得肉桂则补命门。《本经》：主风寒咳逆邪气，寒湿痿痹，拘挛膝痛，脚疼冷弱，不能行步，以此诸病，皆由风、寒、湿三邪客之所致也。邪客上焦

则咳逆,邪客下焦则成痿躄,拘挛膝痛,脚疼冷弱,不能行步。此药性太热而善走,故亦善除风、寒、湿三邪。三邪祛则诸证自瘳矣。症坚积聚血瘀,皆血分虚寒,凝而不行所成。血得热则行,故能疗之。其主金疮,亦谓金疮为风寒所郁击,血瘀不活之证,而非血流不止之金疮也。《别录》又主腰脊风寒,脚气冷弱,心腹冷痛,及脾虚寒客中焦为霍乱,客下焦肝肾之分为转筋。偕诸补气药则温中,补血药则强阴坚肌骨。火能消物,气性热极,入血善行,故善堕胎。为百药长,引参、术、黄耆、茯苓,则温暖脾胃,除脾湿,祛肾寒,补下焦阳虚。佐之以桂,则除脏腑沉寒,三焦厥逆,湿淫腹痛,胃寒蛔动,气虚经闭,补阳虚,散虚壅。亦可入足太阳、少阴,故治督脉为病,脊强而厥。督脉夹脊而上,并足太阳膀胱经。膀胱者,肾之府,故主之也。天雄、乌头、侧子,本是同生。第其形质有异,老嫩或殊,大热大毒,则未始有别也。

【主治参互】附子得生干姜、桂枝,主伤寒直中阴经,温中散寒,而能出汗。

佐人参,兼肉桂、五味子,则补命门相火不足,回阳有神。

得人参、肉桂,治元气虚人,暴寒之气入腹,腹痛作泄,完谷不化,小水不禁。佐白术为除寒湿之圣药。

得黄耆、人参、炙甘草、白芍药、橘皮、五味子,主痈疽溃后去脓血过多,以致饮食不进,恶心欲呕,饮食不化,不生肌肉,亦主久漏冷疮。

得人参、白芍药、炙甘草、砂仁、橘皮,主小儿慢惊。加莲肉、白扁豆,则治吐泻不止。

得术、桂、牛膝、木瓜、橘皮，主寒疝痛极，立止。

得术、木瓜、石斛、萆薢、薏苡仁、橘皮、茯苓，治风湿麻痹肿痛，脚气之无热证者，辄验。

得人参、橘皮，主久病呕哕反胃，虚而无热者良。

经曰：肾苦燥，急食辛以润之。附子同肉桂之辛，入八味丸以润肾燥。阳虚无热证者宜之。

【简误】附子既禀地二之火气，兼得乎天之热气以生，是阴阳凑合，无非火热为性，气味皆然，毒可知已。论其性质之所能，乃是退阴寒，益阳火，兼除寒湿之要药，引补气血药入命门，益相火之上剂。若非阴寒寒湿，阳虚气弱之病，而误用之于阴虚内热，血液衰少，伤寒温病，热病阳厥等证，靡不立毙。谨列其害如下。医师司命，宜详玩而深鉴之，亦生人之大幸也。

伤寒阳厥，其外证虽与阴厥相类，而其内实不相侔，何者？阳厥之病，若系伤寒温疫，其先必发热头疼口渴，其后虽头不疼而表热已除，然必面赤颧红，二便不利，小水必赤，或短少，是其候也，此当下之病也。产后血虚，角弓反张，病名曰痉。痉者，劲也。是去血过多，阴气暴虚，阴虚生内热，热则生风，故外兼现乎风证，其实乃阴血不足，无以荣养于筋所致，足厥阴肝家大虚之候，此宜益阴补血清热则愈也。故凡病人一见内热口干，咽干口渴，渴欲引饮，咳嗽多痰，烦躁，五心烦热，骨蒸劳热恶寒，阴虚内热外寒，虚火上攻齿痛，脾阴不足，以致饮食无味，小便黄赤短涩及不利，大便不通或燥结，腹内觉热闷，喜饮冷浆及鲜果，畏火及日光，兼畏人声、木声。虚阳易兴，梦泄不止。产后发热，产后血行不止，及

恶疮臭秽,小产,憎寒壮热,中暑厥晕,阴虚头晕,中暑暴泄,利下如火,赤白滞下。小儿中暑,伤食作泄,小便短赤,口渴思饮。血虚腹痛,按之即止。火炎欲呕,外类反胃,而恶热焦烦,得寒暂止。中热腹中绞痛,中暑霍乱吐泻,或干霍乱;或久疟寒热并盛;或赤白浊,赤白淋,尿血,便血,血崩,吐衄,齿衄,舌上出血;目昏,神短,耳鸣,盗汗,汗血,多汗恶热;老人精绝阳痿,少年纵欲伤精,以致阴精不守,精滑,脑漏;妇人血枯无子,血枯经闭;肾虚小便余沥,血虚大便燥结,阴虚口苦舌干,心经有热,梦寐纷纭;下部湿热,行履重滞,湿热痿痹,湿热作泄,湿热脚气;小儿急惊内热,痘疮干焦黑陷,痘疮火闭不出,痘疮皮薄娇红,痘疮因热咬牙,痘疮挟热下利,痘疮余毒生痛;中风僵仆不语,中风口眼歪斜,中风语言蹇涩,中风半身不遂,中风痰多神昏;一切痈疽未溃,金疮失血发痉;血虚头痛,偏头风痛,上来内、外、男、妇、小儿共七十余症,病属阴虚及诸火热,无关阳弱,亦非阴寒,法所均忌。倘误犯之,轻变为重,重者必死,枉害人命,此药居多。临证施治,宜谨审之。世徒见其投之阳虚之候,肺肾本无热证者,服之有起死之殊功,而不知其用之阴虚如上诸病,亦复下咽莫救,故特深著其害,以表其非尝试轻用之药也。业医君子,可不慎诸!

半夏

味辛,平,生微寒,熟温,有毒。主伤寒寒热,心下坚,下气,咽喉肿痛,头眩,胸胀咳逆,肠鸣,止汗,消心腹胸膈痰热满结,咳嗽上气,心下急痛坚痞,时气呕逆,消痈肿,堕胎,疗痿黄,悦泽面

目。生令人吐，熟令人下。用之汤洗，令滑尽。射干为之使。恶皂荚。畏雄黄、生姜、干姜、秦皮、鳖甲。反乌头。忌羊血、海藻、饴糖。

【疏】半夏得土金之气，兼得乎天之燥气，故其味辛平苦温，火金相搏，则辛而有毒。洁古谓：味辛苦，性温，气味俱薄，沉而降。好古谓其辛厚苦轻，阳中阴也。入足太阴、阳明、少阳，亦入手少阴经。柴胡为之使。辛温善散，故主伤寒邪在表里之间，往来寒热。苦善下泄。邪在胸中则心下坚，胸胀咳逆。邪在上焦则头眩。邪在少阴则咽喉肿痛。《别录》亦谓其消心腹胸膈痰热满结，咳逆上气，心下急痛坚痞，时气呕逆，亦皆邪在上焦胸中之所致，故悉主之也。中焦者，足太阴之所治也。有湿有热，清浊不分则肠鸣，湿热胜则自汗，入足太阴，故并主之。辛能散结，故消痈肿。脾家湿热，则面色痿黄。实脾分水燥湿，则前证俱除，面目因而滑泽矣。辛温有毒，故堕胎也。

【主治参互】张仲景《伤寒论》小结胸痛，正在心下，按之则痛，脉浮而滑者，小陷胸汤主之；半夏半升，黄连一两，栝楼实大者一个，水六升。先煮栝楼至三升，去滓，内二味，煮取二升，分三服。

又治少阴咽痛生疮，不能言语，声不出者，苦酒汤主之：半夏七枚打碎，鸡子一枚，头开一窍，去黄，纳苦酒令小满，入半夏在内，以环子坐于炭火上，煎三沸，去滓，置杯中，时时咽之，极验。未瘥更作。

《金匱要略》治支饮作呕，呕家本渴，不渴者，心下有支饮

也。或似喘不喘，似呕不呕，似哕不哕，心下愤愤，并宜小半夏汤。用半夏泡七次，一升，生姜半升，水七升，煮一升五合，分温服。

又治呕、哕、眩、悸，谷不得下。小半夏加茯苓汤：半夏一升，生姜半斤，茯苓三两，切，以水七升，煎一升半，分温服之。

又，心下悸忪，半夏麻黄丸：半夏、麻黄等分，为末，蜜丸小豆大。每服三十丸，日三。

又，呕吐反胃，大半夏汤：半夏三升，人参三两，白蜜一升，水一斗二升，和，扬之一百二十遍，煮取三升半，温服一升，日再服。亦治膈间支饮。

又，张仲景方，治黄疸喘满，小便自利，不可除热者：用半夏半斤，生姜半斤，水七升，煮一升五合，分温再服。有一人气结而死，心下暖，以此少许入口，其人遂活。

洁古《活法机要》方：风痰头晕，呕逆目眩，面青黄色，脉弦者，水煮金花丸：用生半夏、生天南星、寒水石煨，各一两，天麻半两，雄黄二钱，小麦面三两，为末，水和成饼，水煮浮起，漉出，捣丸梧子大。每服五十丸，姜汤下，极效。亦治风痰咳嗽，二便不通，风痰头痛。

又治风痰喘逆，兀兀欲吐，眩晕欲倒：半夏一两，雄黄三钱，为末，姜汁浸，蒸饼丸梧子大。每服三十丸，姜汤下。已吐者加槟榔。

又治湿痰咳嗽，面黄体重嗜卧，兼食不消，脉缓者，白术丸：用半夏、南星各一两，白术一两半，为末，薄糊丸梧子大。每服五

十丸，姜汤下。

又治气痰咳嗽，面白气促，洒淅恶寒，愁忧不乐，脉涩者，玉粉丸：用半夏、南星各一两，官桂半两，为末，糊丸梧子大。每服五十丸，姜汤下。

《和剂局方》治停痰留饮，胸膈满闷，气短恶心，饮食不下，或吐痰水。茯苓半夏汤：用半夏泡五两，茯苓三两，每服四钱，姜七片，水一钟半，煎七分，甚捷径。

又搜风化痰，安神定志，利头目，辰砂化痰丸：用半夏曲三两，天南星炮一两，辰砂、枯矾各半两，为末，姜汁打糊丸梧子大。每服三十丸，食后姜汤下。

又治风痰喘急，千缙汤：用半夏汤洗七个，甘草炙、皂荚炒各寸许，姜三片，水一盞，煎七分，温服。

又治停痰冷饮呕逆。橘皮半夏汤：用半夏水煮熟，陈橘皮各半两，每服四钱，生姜七片，水二盞，煎一盞，温服。

又治胃寒嘔逆，停痰留饮，藿香半夏汤：用半夏汤泡炒黄二两，藿香一两，丁香皮半两，每服四钱，水一盞，姜七片，煎服。

又治伏暑引饮，脾胃不和，消暑丸：用半夏醋煮一斤，茯苓半斤，生甘草半斤，为末，姜汁面糊丸梧子大。每服五十丸，热汤下。

又治中焦痰涎，利咽，清头目，进饮食：半夏泡七次四两，枯矾一两，为末，姜汁打糊，或煮枣肉，和丸梧子大。每姜汤下十五丸。寒痰加丁香五钱，热痰加寒水石煅四两，名玉液丸。

《御药院方》治膈壅风痰：半夏半斤，酸浆浸一宿，温汤洗五

十遍，去恶气，日干，为末，浆水搜作饼，日干，再研为末。每五两入生龙脑一钱，以浆水浓脚和丸鸡头子大。纱袋盛，避风处阴干。每服一丸，好茶或薄荷汤嚼下。

叶氏方：治风痰、湿痰，青壶丸：半夏一斤，天南星八两，各汤泡晒干，为末，姜汁和作饼，焙干，入神曲半两，白术末四两，枳实末二两，姜汁面糊丸梧子大。每服五十丸，姜汤下。

作三仙丸，能化痰利气。

《斗门方》消痰开胃，去胸膈壅滞：用半夏洗泡焙干为末，自然姜汁和作饼，湿纸裹，煨香，以熟水二盏，同饼二钱，入盐五分，煎一盏，服之，大压痰毒及酒食伤，极验。

《机要》又治结痰不出，语音不清，年久者亦宜。玉粉丸：半夏半两，桂心一字，草乌半字，为末，姜汁浸蒸饼丸芡实大。每服一丸，夜卧含咽。

《活幼口议》治小儿痰吐，或风壅所致，或咳嗽发热，饮食即呕：半夏泡七次半两，丁香一钱，以半夏末水和包丁香，用面重包，煨熟，去面为末，生姜自然汁和丸麻子大。每服二三十丸，陈皮汤下。

《肘后方》治冒寒霍乱腹胀：用半夏、桂枝等分为末，水服方寸匕。

又治产后晕绝：半夏末，冷水和丸大豆大，纳鼻中即愈。此扁鹊法也。

《永类铃方》打扑瘀痕：水调半夏末涂，一宿即没。

魏元君方：卒死不寤，用半夏末吹鼻中，即活。

《子母秘录》治五绝急病：一曰自缢，二曰墙压，三曰溺水，四曰魇魅，五曰产乳。并以半夏末，纳大豆一丸入鼻中，心温者，一日可活也。

刘长春《经验方》治吹奶肿痛。半夏一个煨研，酒服，立验。一方：以末随左右嗜鼻效。

《箠中方》：治蝎蛰螫人，用半夏末，水调涂之，立止。

【简误】半夏辛温性燥而有毒，虽能祛湿分水实脾，开寒湿痰，气郁结痰，而其所大忌者，乃在阴虚血少，津液不足诸病。故古人立三禁，谓血家、渴家、汗家也。故凡一切吐血、衄血、咯血、齿衄、舌上出血、金疮、产后失血过多、尿血、便血，肾水真阴不足发渴、中暑发渴、阳虚自汗、阴虚盗汗、内热烦躁出汗诸证，皆所当禁者也。然三禁之外，应忌者尚多，兹更详列于后：凡咳嗽由于阴虚火空，上炎烁肺，喉痒，因而发嗽，内热煎熬津液，凝结为痰所致，而不由于寒湿，病本乎肺而不本乎脾；呕吐由于火冲胃热，而不由于寒湿痰壅；饮食不化由于脾阴不足，而不由于因湿脾慢；呕、哕、眩、悸，谷不得下，由于胃气虚弱，见食厌恶，而不由于寒湿邪所干。霍乱腹胀由于脾虚邪热客中焦，而不由于寒湿饮食停滞。咽痛由于阴虚，肾水不足则水涸而阳无所附，故火空上炎而发咽痛，而不由于伤寒少阴病邪热不解。气喘由于气虚，而不由于风寒所郁。头痛由于血虚，而不由于痰厥。小儿吐痰由于伤热，而不由于脾胃。不寐由于心经血少，而不由于病后胆虚。自汗由于表虚腠理不固，而不由于湿热内客自胜。如上诸证，法所同禁。其所最易误而难明者，世医类以其能去痰，凡见

痰嗽莫不先投之,殊不知咳嗽吐痰,寒热骨蒸,类皆阴虚肺热,津液不足之候,误服此药,愈损津液,则肺家愈燥,阴气愈虚,脓痰愈结,必致声哑而死。若合参、术,祸不旋踵。盖以其本脾胃家药,而非肺肾药也。寒湿痰饮作嗽,属胃病者固宜,然亦百之一二。其阴虚火炽,煎熬真阴,津液化为结痰,以致喉痒发咳者,往往而是。故凡痰中带血,口渴咽干,阴虚咳嗽者,大忌之。又有似中风痰壅失音,偏枯拘挛,及二便闭涩,血虚腹痛,于法并忌。犯之过多,则非药可救。吉凶贸理,悔不可追,责在司命,谨诸!戒诸!

大黄

味苦,寒,大寒,无毒。主下瘀血,血闭寒热,破症瘕积聚,留饮宿食,荡涤肠胃,推陈致新,通利水谷,调中化食,安和五藏,平胃下气,除痰实,肠间结热,心腹胀满,女子寒血闭胀,小腹痛,诸老血留结。黄芩为之使。无所畏。

【疏】大黄禀地之阴气独厚,得乎天之寒气亦深,故其味至苦,其气大寒而无毒。入足阳明、太阴、厥阴,并入手阳明经。气味俱厚。味厚则发泄,故其性猛利,善下泄,推陈致新,无所阻碍。所至荡平,有戡定祸乱之功,故号将军。味厚则入阴分,血者,阴也,故主下瘀血,血闭寒热,症瘕积聚,留饮宿食,荡涤肠胃,通利水谷。其曰调中化食,安和五藏者,概指脏腑积滞既去,则实邪散而中自调,脏自和也。《别录》又云:平胃下气,除痰实,肠间结热,心腹胀满,女子寒热,女子因寒血凝闭而作胀,少

腹痛因于血闭,及诸老血留结,皆由通利开导之力所致也。总之,此药乃除实热燥结,下有形积滞之要品。随经随证以为佐使,则奏功殊疾矣。

【主治参互】大黄君枳实、厚朴,为小承气汤,治伤寒热病,邪结中焦。

治伤寒病发于阴而反下之,心下满而不痛,按之濡,此为痞也,大黄黄连泻心汤主之:大黄二两,黄连一两,以麻沸汤二升渍之,须臾绞汁,分作二次温服。

洁古:用以泻诸实热不通,及泻心下痞满由于实。皆本仲景法也。亦治滞下赤白初起。壮实之人可用枳壳、槟榔、当归、甘草、滑石,作丸投之,是迎而夺之之法也。然不可过剂,过剂则伤胃气。

同碱及白敛、炒陈小粉、没药、乳香、醋、蜜,调傅作痈肿围药。

凡实热湿痰为病,以锦纹大黄酒蒸八两,入前胡八两,橘红四两,外另以青礞石二两,同焰硝二两,入砂罐固济,煅红研末二两。上各取末,以水发为丸梧子大。每常服一二十丸,小病五六十丸,缓病七八十丸,急病一百二十丸,温水吞下,即卧勿动,候药逐上焦痰滞,次日先下糯粕,次下痰涎,未下再服。惟妊娠、水泄忌之。

仲景《金匱玉函方》云:凡人食已即吐,此胸中有火也。大黄一两,甘草炙二钱五分,水一碗,煮半升,温服。此真方滚痰丸也。治一切因痰发为怪证。若入霞天膏为丸,更妙。

西大黄拌蜜及竹沥,九蒸九晒,粉糊为丸如麻子大,薄荷汤吞三钱,治中上二焦有热痰,因发偏头风,诸药不效,目将损者有殊功。又治中焦脾胃湿热下流客肾,以致饱后夜卧即梦遗,临卧以升麻、陈皮汤吞三四钱,湿热去即止。

【简误】经曰:实则泻之。大黄气味大苦大寒,性稟直遂,长于下通,故为泻伤寒、温病、热病实热,热结中下二焦,二便不通,及湿热胶痰滞于中下二焦之要药。祛邪止暴,有拨乱反正之殊功。第具峻利之性,猛烈之气,长驱直捣,一往不返。如武王伐纣,前徒倒戈,血流漂杵,虽应天顺人,救民水火,然亦不免于未尽善之议矣。故凡血闭由于血枯,而不由于热积;寒热由于阴虚,而不由于瘀血;症瘕由于脾虚胃弱,而不由于积滞停留;便闭由于血少肠燥,由不由于热结不通;心腹胀满由于脾虚中气不运,而不由于饮食停滞;女子少腹痛由于厥阴血虚,而不由于经阻老血瘀结;滞下初起即属胃虚,当以补养胃气,清消湿热为本,而不可以妄加推荡;疟病伤于暑气,而不由于山岚湿热;吐衄血由于阴虚火起于下,炎铄乎上,血热妄行,溢出上窍,而不由于血分实热;腰脚风气由于下元先虚,湿热下流,因兹致病,而不专由于风湿外侵;骨蒸积热本于阴精不足,而非实热所致;偏坠由于肾虚,湿邪乘虚客之而成,而不由于湿热实邪所犯;乳痈肿毒由于肝家气逆郁抑不舒,以致荣气不从,逆于肉里,乃生痈肿,而不本于膏粱之变,足生大疔,血分积热所发,法咸忌之,以其损伤胃气故也。故伤寒家,调胃承气汤中用甘草以和之,正谓是也。轻发误投,多致危殆,戒之!戒之!

葶苈

味辛、苦，寒、大寒，无毒。主症瘕积聚结气，饮食寒热，破坚逐邪，通利水道，下膀胱水，伏留热气，皮间邪水上出，面目浮肿，身暴中风热痒，利小腹。久服令人虚。得酒良。

【疏】葶苈禀阴金之气以生，故其味辛苦，大寒无毒。气薄味厚，阳中阴也。为手太阴经正药，故仲景泻肺汤用之。亦入手阳明，足太阳经。肺属金，主皮毛，膀胱属水，藏精液，肺气壅塞则膀胱与焉，譬之上窍闭则下窍不通，下窍不通则水湿泛溢，为喘满，为肿胀，为积聚，种种之病生矣。辛能散，苦能泄，大寒沉阴能下行逐水，故能疗《本经》所主诸病。《十剂》云：泄可去闭，葶苈之属是矣。至苦极寒，有泻无补，暂用尚能损真，久服宁不令人虚也？

【主治参互】《金匱》方：肺病喘急不得卧，葶苈大枣泻肺汤主之。葶苈炒黄捣末，蜜丸弹子大。每用大枣二十枚，水三升，煎取二升，入葶苈一丸，更煎取一升，顿服。亦主支饮不得息。

《外台秘要》通身肿满：苦葶苈炒四两，为末，枣肉和丸梧子大，每服十五丸，桑白皮汤下，日三，大效。

《千金方》腹胀积聚：葶苈子一升，熬，以酒五升浸七日，日服三合。

《篋中方》痰饮咳嗽，含奇丸：用葶苈子一两，纸衬炒令黑，知母、贝母各一两，枣肉半两，砂糖一两半，和丸弹子大。每以新绵裹一丸，含之咽津，甚者不过三丸。

【简误】葶苈，泻肺利小便，治肿满之要药。然味大寒，走而不守，不利于脾胃虚弱，及真阴不足之人。凡肿满由于脾虚不能制水，水气泛溢；小便不通由于膀胱虚，无气以化者，法所咸忌。犯之则轻病重、重必危，慎之！近世甜、苦二种，据《本经》云辛苦，则甜者非矣。总之，疗体皆以行水泄闭为用，多服久服，咸不宜耳。

桔梗

味辛、苦，微温，有小毒。主胸胁痛如刀刺，腹满肠鸣幽幽，惊恐悸气，利五藏肠胃，补血气，除寒热风痹，温中消谷，疗喉咽痛，下蛊毒。

【疏】桔梗，《本经》：味辛，气微温。《别录》：加苦，云有小毒。神农、医和、岐伯、雷公，咸曰无毒，而复加甘。观其所主诸病，应是辛苦甘平，微温无毒。入手太阴、少阴，兼入足阳明胃经。味厚气轻，阴中之阳，升也。伤寒邪结胸胁，则痛如刀刺。邪在中焦，则腹满及肠鸣幽幽，辛散升发，苦泄甘和，则邪解而气和，诸证自退矣。其主惊恐悸气者，心脾气血不足则现此证，诸补心药中藉其升上之力，以为舟楫胜载之用，此佐使之职也。《别录》：利五脏肠胃，补气血者，盖指邪解则脏腑肠胃自和，和则血气自生也。除寒热风痹，温中，疗喉咽痛，下蛊毒者，皆散邪解毒通利之功也。消谷者，以其升载阳气，使居中焦而不下陷，则脾中阳气长浮而谷食自消矣。甄权：用以治下痢及去肺热气促者，升散热邪之故也。日华子：用以除邪辟瘟，肺痈排脓。洁

古：用以利窍除肺部风热，清利头目咽嗌，胸膈滞气及痛，除鼻塞者，入肺开发和解之功也。好古：以其色白，故为肺部引经，与甘草同行，为舟楫之剂，诸药有此一味，不能下沉也。

【主治参互】朱肱《活人书》治胸中痞满不痛，用桔梗、枳壳，取其通肺利膈下气也。

张仲景《伤寒论》治伤寒寒实结胸，用桔梗、贝母、巴豆，取其温中散邪，消谷破积也。又治肺痈唾脓，用桔梗、甘草，取其苦辛清肺，甘温泻火，又能排脓血，补内漏也。其治少阴证二三日咽痛，亦用桔梗、甘草，取其苦辛散邪，甘平除热，合而用之，能调寒热也。后人易名甘桔汤，通治咽喉、口舌诸病。

《南阳活人书》：治伤寒腹胀，阴阳不和者，桔梗半夏汤主之：桔梗、半夏、陈皮各三钱，姜五片，煎服。

《简要济众方》治痰嗽喘急：桔梗一两半，为末，用童子小便半升，煎四合，去滓温服。

仲景《金匱玉函方》治肺痈咳嗽，胸满振寒，脉数，咽干不渴，时出浊唾腥臭，久久吐脓如粳米粥者：桔梗一两，甘草二两，水三升，煮一升，分温再服，朝暮吐脓血则瘥。

《千金方》治喉痹毒气：桔梗二两，水三升，煮一升，顿服。

仲景《伤寒论》少阴证二三日，咽痛者，可与甘草汤；不瘥者，与甘桔汤主之：桔梗一两，甘草二两，水三升，煮一升，分服。又可治口舌生疮。

《永类铃方》治齿齲肿痛：桔梗、薏苡仁等分，为末服。

《经验方》治骨槽风，牙龈肿痛者：桔梗为末，枣瓢和丸皂子